

禮
部
志
稿

四



欽定四庫全書

禮部志稿卷七

建官小序

明 俞汝楫 編

昔周官宗伯掌五禮為吉凶軍賓嘉吉為上帝羣神
先王之祀凶為喪荒弔禴恤賓為朝宗覲遇會同問
視軍為大師大均大甸大役大封嘉為飲食昏冠賓
射饗燕脰燔賀慶故宗伯之屬甚設蓋文德炳離禮

運昌明之會固知伯夷不能獨肩一夔未易居足矣
我太祖衆建諸司最得周官精義而尤垂神于禮故
所建禮曹諸職要以師其意不襲其名長貳視上卿
司屬以下分曹治事孰非宗伯氏遺法也攷其時秩
制三易始定誠重之矣文皇遷都當經營倥偬之際
猶以駐蹕嚴肅儀軌是急特建行在禮部員扈從以
行至定鼎迺草而專設令部官正統而後稍增員額
然大指在因事益官非因官益事也故每以師濟為

塤簞而不聞以侵曠千庖組成弘以來則長貳顛任
詞臣或以蓬瀛清切兼司斗杓或以喉舌尊嚴旋踐
黃閣雲雷霖雨每出春卿地望優崇五官莫及蓋亦
分輔之淵藪端揆之左次矣可無紀與志建官

自周官既湮秦漢以下禮曹未有定制也秦廢典任
吏以主發殿中書者稱尚書次為左右曹漢至武帝
使左右曹吏分平尚書奏事旋罷成帝始置尚書五
曹僕射諸曹外其一為客曹主外國夷狄事光武以

客曹分南北稱六曹而吏曹主選舉蕪掌齋祀則祠
司客司之端見矣魏設五曹客曹分三其下有子曹
晉仍六曹客曹分左右南北而四東晉又五曹有祠
部無客以左僕射領主客祠部尚書領祠部儀曹自
此客曹下列于部中其後特重祠部尚書掌廟祧之
禮常與右僕射通職不並置或右攝祠或祠攝右則
客祠皆屬左右僕也後魏吏部管南北主客祠部管
左右主客北齊改左主客為主爵南主客為主客掌

諸蕃雜客事時尚未有禮部也宇文周置春官卿又有禮部而不言職事俄改禮部為宗伯又春官之屬有典命尋改典命為大司禮最後改大司禮為禮部謂之禮部大夫隋開皇中定置禮部尚書統禮部祠部主客膳部四曹唐承隋制不改龍朔中改為司禮太常伯咸亨復舊光宅又改為春官神龍復舊沿及宋元相因無改然宋初以膳次主客元祐以主客兼膳紹聖主客膳部互置迨金元而有禮部無主客元

成宗又增禮部尚書一員領會同館事然皆為尚書
省屬官與周官宗伯掌邦禮之任固有間矣至國朝
而禮部之設直追周官之舊蓋春官宗伯之職大宗
伯一人小宗伯二人率其屬以修政令而今制尚書
倣大宗伯左右侍郎倣小宗伯四司屬所視事視周
固異云

禮曹之官前代亦無定名秦郎中令屬有五官左右
中郎將三署有中郎侍郎郎中三郎郎中秩比三百

石不屬尚書漢武更名光祿勳而中郎郎中滿六載
爵三級外郎滿六歲爵二級則今員外郎也光武分
六曹命置尚書郎三十四人秩四百石每郎缺輒從
三署選郎五詣尚書臺試箋奏初稱守尚書郎中滿
歲稱尚書郎三歲稱侍郎而客曹主羌胡事迺若起
草明光更直隸禮畫枕夕楫握蘭含雞瑜糜一九赤
管雙筆則諸曹同之矣魏晉宋齊後魏北齊惟置郎
中梁陳兩置隋開皇諱忠不置郎中惟置侍郎六年

始置員外郎蓋魏末常侍晉初侍郎皆有員外散騎而尚書省則自隋始迺漢復有光祿勳主事察諸郎茂才高等為之秩四百石後魏量曹置主事郎從六品上隋置主事令史煬帝於主事去令史名每十令史置一主事時用士人其子曹侍郎但曰郎二郎省一而陞侍郎于六曹各置一人貳尚書唐則主客郎中一為五品員外郎一為六品主事二為九品時立法日以清官兩人侍制衙內郎中員外郎咸與焉御

史歷殿中侍御中丞矣必薦最得員外郎郎中柳子厚以監察御史為禮部員外尚嫌驟顯則是禮部自晉宋來稱清曹選重望高豈一日哉宋制郎中員外郎因之而主事為吏額分案四置吏七然進省八座令僕均統六曹復有左右司郎中員外郎據子部上以遡秦左右曹之意更華要我太祖罷中書省陞六部為二品分寄丞相權而裁左右司釐子部為清吏諸司司置郎中員外郎其職名品秩遂為不易之典

云

國初禮部

洪武元年始置禮部官統於中書省先是中書省惟設四部掌錢穀禮儀刑名營造之務至是上乃命中書省李善長等議建六部分理庶務乃定置吏戶禮兵刑工六部設尚書侍郎郎中員外郎主事首以錢用士為禮部尚書世家為侍郎至上御奉天殿用士等入見諭之曰朕肇基江左軍務方殷所以官制未備今茲以卿等

分任六部國家之事總之者中書分理之者六部至為
要職凡諸政務湏竭心為朕經理或有乖謬則貽患於
天下不可不慎

洪武元年八月中書省奏定六部官制禮部尚書正三
品侍郎正四品郎中止五品員外郎正六品主事正七
品

洪武五年六月定六部職事歲終考績以行黜陟禮部
掌天下禮儀祠祭燕饗貢舉之政其屬有四一曰總部

掌儀制表箋曆日贈謚詔赦科舉圖籍樂律二曰祠部
掌祭祀醫藥喪葬僧道度牒三曰膳部掌燕享膳羞器
物酒醴四曰主客部掌貢獻建言四夷朝貢賞賚設郎
中員外郎主事分掌其事而以尚書侍郎總其政務

洪武六年定六部及諸司設官之數部設尚書二人侍
郎二人禮部設總部祠部膳部并主客四部每部設郎
中員外郎各一人主事各三人通二十人

洪武八年置書畫庫官一人正九品隸禮部

洪武十年吏部奏定六部每科設都吏一人歷九年於
從七品出身掾史令史亦歷九年依已定資格出身

洪武十三年陞禮部官品秩先洪武元年始設禮部定
官秩屬中書省至是罷中書省陞六部官秩倣古六卿
之制分領中書之政陞尚書為正二品侍郎正三品郎
中正五品員外郎從五品主事正六品司務從九品
是年罷禮部備用庫書畫庫

是年又定六部官制凡設官吏五百四十八人官一百

五人尚書六人侍郎七人郎中二十四人員外郎二十四人主事四十四人比唐制減三十二人比舊制減七十一人吏四百四十三人都吏二十四人令史一百三十四人典史二百八十五人比唐制減四百二十六人比舊制減三百四十五人

洪武十五年定禮部官制尚書侍郎各一人提掌天下禮儀祠祭燕饗貢舉之政令其屬有四部焉曰總部掌禮儀表箋歷日贈謚公式印信學校貢舉圖籍之屬郎

中員外郎主事各一人都吏一人令史二人典史四人
曰祠部掌祠祀享祭及樂律祭器犧牲醫學釋道優給
之屬郎中員外郎主事各一人都吏一人令史二人典
史四人曰膳部掌燕饗牲豆酒膳及筭牲器物雜支之
屬郎中員外郎主事各一人都吏一人令史二人典史
四人曰主客掌朝聘進貢諸蕃來朝建言賓客賞勞之
屬郎中員外郎主事各一人都吏各一人令史二人典
史四人承發典史一人架閣兼勾銷典史一人

洪武二十二年改六部所屬總部之名以禮部總部為儀部又以四部郎中員外郎為屬官主事司務為首領官

洪武二十四年增六部司務祿米先是各部主事之下設主事於司務之後署銜月給米二石五斗至是增為三石不署案牘掌催督稽緩勾銷簿書之事

洪武二十五年上以中外文武百司職名之沿革品秩之崇卑勲階之陞轉俸祿之損益歷年茲久屢有不同

無以示成憲於後世迺命儒臣重定其品階勲祿之制
以示天下

正二品六部尚書勲正治上卿階初授資善大夫陞授
資政大夫加授資德大夫祿月米六十一石

正三品左右侍郎勲資治尹階初授嘉議大夫陞授通
議大夫加授正議大夫祿月米三十五石

未入流各部司務祿月米關石

正五品六部郎中勲修政庶尹階初授奉議大夫陞授

奉政大夫祿月米一十六石

從五品員外郎勳協正庶尹階初授奉訓大夫陞授奉直大夫祿月米一十四石

正六品主事初授承直郎陞授承德郎祿月米一十石
洪武二十九年八月改六部諸屬部為清吏司上以六部之屬皆稱部混而無別故欲易其名因寓飭厲之意凡諸屬部更其名者十有三禮部儀部曰儀制祠部曰祠祭膳部曰精膳主客仍舊皆稱清吏司

革除年六月吏部言建文中改舊官制如各部尚書舊
正二品陞正一品又增設侍中二員正二品位侍郎上
所屬諸司舊有清吏二字皆除去並合遵復舊制詔速
復之草侍中禮部尚書仍二品又言建文中改天地壇
祠祭署為南郊祠祭署山川壇籍田祠祭署為籍田祠
祭署泗州祠祭署為泗賓祠祭署宿州祠祭署為新豐
祠祭署又設鍾山祠祭署非舊制上命泗洲宿州地壇
定為郊壇祠祭署鍾山祠祭署不可罷

行在禮部

永樂元年正月以北平為北京二月置北京行部置尚書二員侍郎四員其屬六曹吏戶禮兵工五曹清吏司郎中員外郎主事各一人

是年命禮部鑄北京行部諸司印

十八年定都罷北京行部分置行在六部以備扈從其禮儀之政尚屬于國初禮部九月上命行在禮部自明年正月初一日始正北京為京師不稱行在各衙門

印有行在字者悉送印綬監令預遣人取南京各衙門印給京師各衙門用南京衙門皆加南京二字別鑄印遣人齎給于是國初禮部印轉而北矣

正統元年九月造行禮部印時尚書胡濙自劾不謹失行在禮部之印上不問為更造之改其文曰行禮部印

禮部

正統六年十一月正行在禮部為禮部改給禮部印即國初印也先是正統五年浙江寧波府知府鄭珞言國

初造兩京合于古制自太宗皇帝定鼎北京以來四聖相承正南面而朝萬方四十年于茲矣而諸司文移印章乃尚仍行在之稱名實未當請正京師禮部尚書胡濙言行在太宗皇帝所定不可輒有變更事遂寢至是宮殿成上乃命各司去行在事而于南京文武衙門增南京二字悉改給其印焉

是年添設儀制祠祭二司主事各一員協理司事

天順五年增置禮部儀制司主事一員以尚書石琚言

司事繁冗故也

弘治五年增設禮部主客司主事一員專提督會同館
時有館夫盜夷人財物從兵部奏也

正德二年吏部奉旨查議天順以後添設官員地要政
繁不可裁革禮部儀制司及主客司提督夷人主事昔
二員非要地而事簡可革者禮部鑄印局副使一員得
旨俱裁革別用

萬曆九年裁革儀制祠祭主客三司主事各一員十一年復設

今定設

正官

尚書一員 左右侍郎各一員

司屬官

儀制司郎中員外郎各一員主事二員

如遇選駙馬則添設本司主事一員教習

祠祭司郎中員外郎各一員主事二員

主客司郎中員外郎各一員主事二員

內一員提督會同館

精膳司郎中員外郎主事各一員

首領官

司務二員

所屬衙門 以下照會典

行人司司正一員左右司副各一員

萬歷九年革左司副一員十一年復設

行人三十二員

舊三百四十五員嘉靖中存三十七員萬曆九年
革五員

鑄印局大使一員副使一員

舊二員萬曆九年革一員

教坊司奉鑿一員左右韶舞各一員左右司樂各
一員協同官十五員

附考

國初禮部四屬部各設主事司務一員為首領官通為

主事四員司務四員有主事印至洪武二十九年改主事為司官草主事印而司務亦止設二員以司務為首務官永樂遷都設禮部皆因之至今為定制云

建署

小序

夫人臣夙興以庀王事退食而砥素絲建署弗可後矣然卯金兆祚讀黃圖而知射聲之八署典午偏安覽潘金而知虎賁之寓直則治事之宇又非關國家而急記載者哉矧禮署彰邦教示民不佻伯

夷夙夜之寅桓武世德之館寧殊鳳閣蘭臺拱紫
微而近宸極也者國初之署在留都文皇定鼎於
北有行在禮署宣德五年更建今署而廨宇大備
規制宏遠矣延迄於今不改翬飛鳥草之舊將宗
社實式靈焉謹考厥建置并與其燕息之居詳著
於篇是皆君子攸躋攸寧之所也庶使後之覽者
知風教之地動景行之思焉志建署

永樂十八年八月定京師于北甫經營宮殿開設百司

禮部亦在草創之初未有定署

宣德五年二月建行在禮部於北京大明門之東時五府六部皆未建上命以禮部所典者天地宗廟社稷之重及四方萬國朝覲會同者皆有事於此故首建之位規制皆如南京加宏壯焉

六月新作行在禮部成錫宴落之命公侯駙馬伯都督尚書侍郎都御史學士祭酒及通政司大理寺太常寺太僕寺光祿寺鴻臚寺掌印官及本部屬官皆得與

禮部堂

大門三間西朝扁曰禮部

進大門左為鑄印局右為土地祠

儀門三間左右角門各五間

西廊廊房各十四間

左廳三間為鸞駕伏庫

右廳三間為司務廳

大堂後川堂上揭御製禮部箴

後堂五間 左右堂火房六間

後堂後碑亭二座 亭左房五間

亭右房六間

亭後為架閣庫七間

大堂前左上入儀制司右上入祠祭司左下入主

客司右下入精膳司

儀制司

司門 甬道左右科房六間

正廳三間

左右房各三間
川堂一間
後堂三間

表廳三間

祠祭司

司門
甬道左右科房六間

正廳三間

左右房各四間
川堂一間
後堂三間

主客司

司門 甬道左右科房六間

正廳三間

左右房各四間 後堂三間

精膳司

司門 甬道左右科房六間

正廳三間

左庫房一間 後堂三間

附錄

夷館

正統四年九月改修舊禮部為殿房以館外夷使臣

直房

景泰三年禮部奏本部職掌四夷外國并各處進貢金銀器皿方物及賞賜之類舊有直房三間係吏房禮三部堂上官每日候朝處所於內收貯各處進貢賞賜等物凡今刺闕臣數多賞賜動經萬計收貯不盡遂使各官每日候官無地可處看得吏科北廊房六間是府軍

等衛帶刀上直官軍所處猶有空者乞將帶刀官軍併
作三間其餘三間撥與本部收貯各處進貢金銀方物
及賞賜鈔幣綵緞之類上命如議為禮部直房

修署

正統七年九月修禮部公署

景泰六年五月修禮部四司

景康六年五月廿四日

奉敕大率本朝舊制修定書曰凡今所定

律法並斟酌舊法宜隨時之制志在盡善

不實則非律也律之屬土余以故所定

刑名既其公至問其本律以律本義其

禮部志稿卷七

欽定四庫全書

禮部志稿卷八

明 俞汝楫 編

職掌

小序

語曰官之有司猶農之有畔也韓昭正典冠之
誅見為溺職絳侯不能舉錢穀之對安問司存
故夫職之義在分也各相守則治交相侵則亂
職之義在合也斲相濟則舉兩相諉則廢我聖

祖衆建諸司而著示職掌一書象魏官常垂炳
星日列聖奉為章程不愆不忘侵曠之儆代有
申飭凡厥有位百度惟貞則庶職修明之效即
九官四岳十二牧之秩秩豈足多讓哉禮曹務
視諸曹煩劇什伯之職思其居厥惟艱哉服物
采章度數等威儀曹是問裡祀醮燎禴恤術禳
祠部是問輯瑞來王會同玉帛客司是問籩豆
有踐燕樂嘉賓董戒光祿祗事奉常膳司是問

而兼總條貫則大宗伯少宗伯受成焉噫巖矣
重矣通百給于一身而腓臂異位歸百川于谷
王而河濟分流以是知明作之朝無叢脞之虞
豈漫為任哉志職掌

總職掌

禮部堂石刻 國初立于部堂

尚書 侍郎

掌禮樂儀章郊廟祭祀朝貢會同賓客宴享學校

科學之政及天下祀典其品節之分制度之詳講
議損益考定而頒行之使儀表中外粲然有倫凡
所以敦崇風教厚勵民俗者皆總其職務而奉行
其制令其屬有四總部祠部主客膳部

儀部 郎中 員外郎 主事

治禮樂學校貢舉之式凡制詔禮儀 開讀詔赦萬

壽節正旦冬至朝賀朔望起居大祀誓戒慶成公
侯封拜進歷進春宴享進膳等儀及定服色房舍

器皿儀物等制

表箋

萬壽節正旦冬至表箋本部通類付膳部送

印信

照依大小衙門品級鑄造給降及銷毀裁草印信

頒歷

定造歷日則歷欽天監進呈歷日節次類行

科舉

定科舉呈式開試日期進士出身

雜行

旌表孝子順孫義夫節婦及奏各處申報禎祥灾異定各衙門行移體式等事

祠部

郎中

員外郎

主事

治祠祭百神及釋道之典凡祠祭

部祀宗廟丁祭皇陵歷代帝王

陵廟并一應祭祀喂養犧牲及在外祭祀日期

學校國監府州縣學及歲貢生員教官生員丁憂事故等事

卜筮醫藥選舉術士占候醫病

樂律神樂觀舞生教坊司樂戶侑食樂工

喪葬公侯喪禮曠誌贈諡及軍官喪禮優給

僧道凡僧道衙門寺觀住持僧道度牒等事

客部 郎中 員外郎 主事

治侯邦蕃國朝貢之儀凡四夷朝貢外國及土官之屬

賓客

接待外國來使土官進表使臣及禮待賢德官員

貢舉

起取及考試通經秀才

建言

定議可否

給賜

官員軍士外國土官輕重等第

膳部郎中 員外郎 主事

治宴賜牲酒膳羞之事凡膳羞

藏冰蔬種等事

宴享

公支管待物件及茶飯下程則例

器物

厨役銅牌公解什物朝服象牙牌面

酒醴成造酒器造酒則例

雜行收受表箋本部俸給通類勘合

大明會典

尚書侍郎掌邦禮其屬郎中員外郎主事掌貳尚書侍郎之事有所疏請則各舉其職事以質于尚書侍郎而受其成

儀制清吏司分掌禮儀宗封學校科貢舉其儀度而辨其名數

祠祭清吏司分掌郊廟羣祀之典及喪禮厯日方伎之事

主客清吏司分掌諸番朝貢接待給賜之事簡其譯伴明其禁令凡百官恩賚各省土貢亦隸焉

精膳清吏司分掌宴饗牲豆酒膳之事會其品數而程其出納

聖諭

宣宗皇帝御製禮部箴諭曰朕承大寶臨撫兆民實

賴文武羣臣同心同力以興起治功昔舜命九官十
二牧皆孜孜訓諭虞史書之夫以大舜為君臯陶稷
契革為之臣猶致傲如此況朕菲薄敢不寃心然遠
臣既不得數見而又諭之近臣雖朝夕相接亦不得
數以言諭因取古人箴傲之義凡中外諸臣各著一
篇使揭諸廳事朝夕提觀庶幾有傲然古之君臣有
交傲之道凡在位君子有以嘉謨告朕者尤朕所樂
聞也

禮部箴

聖人立極法天出治為治之大莫大于禮稽古伯夷為
虞秩宗所典三禮宗伯攸同既治神人亦和上下政本
之地實宣教化惟我祖宗承古之道品節制度式昭禮
教幽明崇卑秩乎有序大法大經靡不備舉咨爾禮官
夙夜惟寅秉其直清以交神明安上治民爰及四裔祇
修舊章亦義之比惟卿暨佐汝予協恭暨厥四屬于卿
率從治國去禮猶耕無耜咸篤敬天以懋政事宣德七

年夏六月

禮部志稿卷八

欽定四庫全書

禮部志稿卷九

明 俞汝楫 編

儀制司

朝賀

國初朝賀等儀多仍前代之舊後乃斟酌繁簡定為中制以頒示天下具見諸司職掌至嘉靖間稍加更定今備列之首儀注次樂章而附沿革事例

於後

正旦冬至百官朝賀儀

洪武二十六年定凡正旦冬至前一日尚寶司陳御座於奉天殿及寶案於御座之東設香案於丹陛之南教坊司設中和韶樂於殿內之東西北向其日清晨錦衣衛陳鹵簿儀仗於丹陛及丹墀之東西設朋扇於殿內東西列車輅步輦於丹墀東西相向鳴鞭四人左右北向教坊司陳大樂於丹陛之東西北向儀禮司設同文

玉帛案於丹陛之東金吾衛設護衛官於殿內及丹陛
之東西陳甲士於午門外奉天門外及丹墀東西錦衣
衛設將軍於奉天門外丹陛丹墀及奉天門列旗幟於
奉天門外東西典牧官陳仗馬犀象於文武樓南東西
相向欽天監設司晨卽報時位於內道東近北立糾儀
御史二人於丹墀北東西相向內贊二人於殿內外贊
二人於丹墀北東西相向設傳制宣表等官位於殿內
東西相向鼓初嚴文武官具朝服齊班於午門外鼓次

嚴引禮引百官繇左右掖門入詣丹墀東西北向立鼓
三嚴執事官詣華蓋殿伺候內官跪奏皇帝具袞冕陞
座鐘聲止儀禮司官跪奏各執事官行禮贊五拜禮畢
贊供事執事官各就位儀禮司官跪奏請陞殿駕輿中
和韶樂奏聖安之曲尚寶官捧寶前行導駕官前導扇
開簾捲尚寶官置寶於案樂止鳴鞭報時鷄唱曉對贊
唱排班班齊贊禮唱鞠躬大樂作贊四拜平身樂止典
儀唱進表樂作給事中二人詣同文案前導引序班舉

案繇東門入置殿中樂止內贊唱宣表目宣表目官跪
宣訖俯伏興唱宣表展表官取表宣表官至簾前外贊

唱衆官跪宣表訖內外皆唱俯伏興平身序班即舉表

案於殿東外贊唱衆官皆跪代致詞官跪於丹陛中致

詞云具官臣某等茲遇

正旦則云三陽開泰萬物咸新
冬至則云律應黃鍾日當長至

恭惟皇帝陛下膺乾祐奉天永昌賀訖外贊唱衆官

皆俯伏興樂作四拜興平身樂止傳制官詣御前跪奏

傳制俯伏興繇東門靠東出至丹陛之東西向立稱有

制贊禮唱跪百官皆跪宣制

正旦則云履端之慶
冬至則云履長之慶

與卿

等同之贊禮唱俯伏興平身樂止贊執笏鞠躬三舞蹈

贊跪唱山呼百官拱手加額曰萬歲唱山呼曰萬歲唱

再山呼曰萬萬歲凡呼萬歲樂工軍校齊聲應之贊出

笏俯伏興大樂作贊四拜平身樂止儀禮司官跪奏禮

畢中和樂作奏定安之曲駕興尚寶官捧寶導駕官前

導至華蓋殿樂止引禮官引百官以次出

洪武三十年更定同文案玉帛案俱繇殿東門舉進安

於殿中宣表訖舉同文玉帛案俱安於寶案之內

嘉靖十六年更定前一日尚寶司設寶案於奉天殿寶座之東鴻臚寺設表案二於殿東中門外禮部主客司設番國貢方物案八於丹陛中道左右欽天監設定時鼓於文樓之上教坊司設中和韶樂於奉天殿內東西設大樂於奉天門內東西俱北向至期錦衣衛陳鹵簿儀仗於丹陛及丹墀東西設朋扇於殿內東西陳車輅步輦於奉天門丹墀中道北向金吾等衛列甲士軍仗

於午門外奉天門外及丹墀東西旗手衛設金鼓於午門外列旗幟於奉天門外御馬監設仗馬錦衣衛設馴象於文武樓南東西相向欽天監設報時位於丹陛之東鼓初嚴百官具朝服齊班於午門外鼓次嚴引班官引百官并進表人員及四夷人等次第繇左右掖門入詣丹墀序立欽天監鷄唱官司晨一員於文樓下西向錦衣衛將軍六員於殿內之南北向將軍四員於丹陛四隅東西相向

其餘侍衛將軍各分
立於殿陛等處如儀

鳴鞭四人於丹陛

中道左右北向金吾等衛護衛官二十四員於丹陛之
南六員於丹墀之北俱東西相向陳設方物鴻臚寺司
賓署丞一員徹方物案鴻臚寺序班十六員於丹陛中
道左右外贊鴻臚寺鳴贊等官十二員於丹陛及丹墀
東西糾儀御史十二員於丹墀之東西殿前侍班錦衣
衛千戶六員光祿寺署官四員序班二員傳呼鳴鞭錦
衣衛百戶四員俱於殿中門外東西相向導表六科都
給事中二員序班二員於表案左右掌領侍衛官三員

於殿內東西相向錦衣衛正直指揮一員於簾右東向

百戶二員於簾下左右相向

捲簾畢即趨出殿門外

各豫立以俟

鼓三嚴執事禮部堂上官并內贊鳴贊一員陳設表案

并舉案序班五員典儀鴻臚寺司儀署丞一員捧表禮

部儀制司官四員展表六部都察院通政司大理寺堂

上官二員宣表致詞并傳制等項鴻臚寺堂上官五員

捧寶尚寶司官二員導駕六科給事中十員殿內侍班

翰林院官四員中書官四員糾儀御史四員序班二員

及各遣祭官俱詣華蓋殿外候上具袞冕陞座鍾聲止
入序立遣祭官以次復命訖各趨入丹墀班禮部堂上
官跪奏方物并請上位看馬候得旨復位鴻臚寺卿跪
奏執事官行禮贊五拜叩頭畢贊各供事鴻臚寺卿跪請
陞殿駕興導駕官前導尚寶官捧寶前行中和樂作奏
聖安之曲上御奉天殿陞座導駕官立於殿內柱下東
西相向侍班翰林官立於東導駕官之後中書官立於
西導駕官之後糾儀御史序班分立於侍班官之下尚

寶官置寶於案分立於導駕官之上樂止鳴鞭報時鷄
唱訖外贊唱排班班齊鞠躬大樂作四拜興平身樂止
內贊贊進表大樂作導表官導表案至殿東中門止序
班舉案入置於殿中退立於東西柱下樂止贊宣表目
禮部堂上官并宣表目官詣殿中跪宣畢各叩頭退贊
宣表展表官取表同宣表官詣殿中跪外贊贊跪衆官
皆跪宣畢展表官分東西先退內外皆贊俯伏大樂作
興平身樂止宣表官退序班舉案置殿東外贊贊跪衆

官皆跪代致詞官跪於丹陛中道致詞云公侯駙馬伯

文武百官某官臣某等

詞與洪武間所定同

賀訖外贊贊俯伏官

皆俯伏大樂作四拜興平身樂止傳制官詣御前跪奏
傳制俯伏興繇東門靠東出至丹陛之東西向立稱有

制外贊贊跪衆官皆跪宣制

制與洪武間所定同

宣訖外贊贊俯

伏大樂作興平身樂止贊措笏鞠躬三舞蹈贊跪唱山
呼百官拱手加額曰萬歲唱山呼曰萬歲唱再山呼曰
萬萬歲贊出笏俯伏大樂作四拜興平身樂止鴻臚卿

詣御前跪奏禮畢鳴鞭中和樂作奏定安之曲駕興尚
寶官捧寶導駕官前導至華蓋殿樂止引班官引百官
人等以次出序班徹方物案所司設黃幄於丹陛上陳
王府及勲臣總兵官外夷所進馬匹於丹陛內禮部并
鴻臚寺官立於丹墀東候上易便服御黃幄甲士行禮
畢禮部官詣御道中跪奏御馬過畢復位候御馬過
詣御道中跪奏馬過畢駕還宮

嘉靖四十一年更名奉
天殿曰皇極殿門曰皇

極門華蓋殿曰中極
殿後具儀俱用新名

舊制冬至日即行賀禮嘉靖九年分祀二郊以冬至大報是日行慶成禮次日行冬至朝賀禮畢舉慶成宴本年再定次日上詣內殿行節祭禮又詣母后前行賀禮畢始御奉天殿受百官賀

冬至大祀慶成儀

嘉靖七年定上大祀禮成駕還百官具朝服於承天門外橋南立迎駕隨至奉天殿丹墀內侍立執事官先至華蓋殿前東西拱立候上御華蓋殿具衮冕服陞座鴻

臚寺堂上官跪奏執事官行禮鳴贊贊入班鞠躬五拜
叩頭興平身各供事鴻臚寺堂上官跪奏請陞殿教坊
司樂作上御奉天殿陞座樂止錦衣衛官傳鳴鞭鴻臚
寺堂上官傳排班鳴贊贊排班班齊鞠躬四拜興平身
贊跪鴻臚寺堂上官於丹陛中道跪致詞曰公侯駙馬
伯文武百官某官臣某等恭惟圜丘大報載成禮當慶
賀致詞畢繇殿東門入殿內侍立鳴贊贊俯伏興鞠躬
樂作四拜興平身樂止鴻臚寺堂上官於殿內跪奏禮

畢傳贊禮畢錦衣衛官傳鳴鞭上還宮百官退

萬壽聖節百官朝賀儀

洪武二十六年定儀與正旦冬至同但致詞云恭惟皇

帝陛下萬壽令節

至三十年改
令節為聖節

臣某等誠懽誠忭敬祝

萬萬歲壽

嘉靖年定儀亦與正旦冬至同但鴻臚寺加設玉帛案
二於殿內簾前致詞詞與洪武年間所定同

朝賀樂

洪武間定

以後樂俱同

殿內中和韶樂

樂器

麾一

簫十二

笙十二

排簫四

橫笛

十二

塤四

箎四

琴十

瑟四

編鍾二

編磬二

應鼓二

祝一

敔一

搏拊一

樂章

陞殿奏聖安之曲

乾坤日月明八方四海慶太

平龍樓鳳閣中扇開簾捲帝王興聖感天地靈保

萬壽洪福增祥光王氣生陞寶座永康寧

公卿入門奏治安之曲

後不用

忠良為股肱昊天

之德承主恩森羅拱北辰御爐香遶奉天門江山
社稷興安天下軍與民龍虎會風雲賀萬壽聖明
君

丹陛大樂

樂器 麾一 戲竹二 簫十二 笙十二 笛十

二 頭管十二 簃八 琵琶八 二十絃八

方響二 鼓二 拍板八 杖鼓十二

樂章

百官行禮奏萬歲樂朝天子之曲 雨順風調昇

平世萬萬年山河社稷八方四面干戈息慶龍虎

風雲會 右萬歲樂

聖德聖威洪福齊天地御階前文武兩班齊擺列

在丹墀內舞蹈揚塵山呼萬歲統山河壯帝畿禮

儀讚稽慶龍虎風雲會 右朝天子

還宮奏定安之曲 九五飛聖龍千邦萬國敬依從

鳴鞭三下同公卿環珮響玳瑁掌扇護御容中和
樂音呂濃翡翠錦繡擁還華蓋赴龍宮

歷朝事例

洪武元年令正旦冬至及壽日各衙門不許於寺觀
行香其萬歲牌不許復設二十二年令凡遇大朝賀除
已習儀及具服官員許入班其餘便服人員止於午門
外行禮執事官於華蓋殿行禮排甲帶刀侍衛之人免
拜五府六部等官於殿內侍立

今皆入班

奏事止於華

蓋殿

永樂六年令帝王生日先於宗廟具禮致祭然後序家人禮百官慶賀禮畢筵宴

嘉靖七年奏准凡遇萬壽聖節正旦冬至大朝賀先令承天門端門及左右闕門守門內外官員嚴禁雜人行走鼓初嚴執事官并侍衛官軍先入次皇親公侯駙馬伯次在京文武品官次來朝品官次內外雜職次生儒次外國四夷人至奉天殿下文武百官依品級序立毋

得攬越亂班禮畢外國四夷先出次生儒次雜職次文武品官次侍衛官軍及儀從人等俱盡象馬方行其金水橋東西角門各添設序班凡有攬越者御史序班糾舉拏奏若有市井奸人假借儒吏衣巾冒入殿庭錦衣衛官校緝拏又令凡正旦冬至聖節百官俱於先期之三日及二日習儀正旦冬至於朝天宮聖節於靈濟宮九年更定郊祀冬至習儀於先期之七日及六日二十一年令聖節正旦冬至俱赴朝天宮習儀凡正旦節自

十二月二十八日起至正月二十日止百官俱吉服通政司不奏事冬至前三日後三日聖節前三日後三日俱吉服通政司亦不奏事凡朝賀班首致詞官例用勳臣有缺則禮部題請欽定凡進賀表日親王各一通各處掛印總兵官各一通朝鮮國王一通南京禮部等衙門一通浙江等布政司按察司直隸府州等衙門各一通南京中軍等都督府一通中都留守司浙江等都司直隸衛所等衙門各一通凡大朝賀先期禮部移文各

衙門取具執事等官職名并陳設儀衛等項數目榜揭習儀處所以便供事

隆慶二年題准丹墀糾儀序班添二員

萬曆七年諭衍聖公以萬壽入賀朝廷待以賓禮不在文武職官之列不必朝參九年題准衍聖公及顏曾孟三氏子孫只許三年一次入賀於朝覲年行

中宮正旦冬至命婦朝賀儀

洪武二十六年定凡正旦冬至前期一日女官陳設御

座於宮中設香案於丹墀之南其日內官陳設儀仗於丹陛之東西及丹墀東西女官擎執者立於御座之左右陳女樂於丹陛東西北向設箋案於殿東門外設班首拜位於中道之東西設命婦拜位於丹墀北向設司贊位於丹墀東西設司賓位於北東西相向設內贊二人位於殿內東西命婦至宮門外司賓引命婦入就拜位女官具服侍班如常儀尚宮尚儀等官詣內奉迎尚儀奏請陞座皇后具服出導從如常儀樂作陞座樂止

司贊唱班齊樂作贊四拜樂止內贊唱進箋引箋案女
官前導舉箋案女官二人舉案繇殿東門入樂作至殿
中樂止贊衆命婦跪內贊唱宣箋目宣箋目女官宣訖
興唱宣箋展箋女官詣案前取箋宣箋女官宣訖興舉
案者舉案於殿東贊命婦皆興司賓引班首繇東階升
樂作自東門入至殿中樂止內贊唱跪班首跪司贊唱
跪衆命婦皆跪班首稱某夫人妻某氏等茲遇正旦則
云履端

之節冬至則敬詣皇后殿下稱賀今班首致詞稱賀
云履長之節俱司言女官代內

贊司贊同唱興班首及殿外命婦皆興司賓引班首繇
 西門出降自西階樂作至拜位樂止贊拜樂作四拜樂
 止司言前跪將旨繇東門靠東出至於丹陛東西向立
 稱有旨司贊唱跪衆命婦皆跪司言宣旨
正旦則云履
 端之慶冬至
則云履
 長之慶與夫人等同之贊興衆命婦皆興司贊唱拜樂
 作四拜樂止尚儀跪奏禮畢皇后興樂作還宮樂止引
 禮引命婦以次出

中宮千秋節命婦朝賀儀

洪武二十六年定中宮千秋節命婦朝賀禮儀與正旦
冬至同但致詞云茲遇千秋令節敬詣皇后殿下稱賀
不傳旨

朝賀女樂

樂器 戲竹二 簫十四 笙十四 笛十四 頭
管十四 簫十 琵琶八 二十絃八 方響六
鼓五 拍板八 杖鼓十二

樂章 天香鳳韶 寶殿光輝晴天映懸玉鉤珍珠

簾櫳瑤觴舉時簫韶動慶大筵來儀鳳昭陽玉帛
齊朝貢讚孝慈賢助仁風歌謔正在昇平中謹獻
上齊天頌

太皇太后聖旦正旦冬至命婦朝賀儀

皇太后聖旦正旦冬至命婦朝賀儀

儀注樂器俱與中宮同

樂章 天香鳳韶 龍樓鳳閣彤雲曉開繡簾天香

芬馥瑤階春煖千花簇壽聖母齊頌祝御筵奏獻

長生曲坤道寧品類咸育和氣四時調玉燭饗萬
萬年太平福

凡命婦例應朝賀者禮部先期告示各照其夫品級具
珠翠冠大袖紅衫霞帔齋執禮部印信票帖清晨自北
安東安西安等門從便入至東西華門外候引入宮朝
賀

東宮親王并妃正旦冬至宮中朝賀儀

洪武初定凡正旦冬至日上位中宮陞乾清宮御座侍

從導引如常儀引禮引皇太子及妃親王及妃詣上位
前贊禮贊鞠躬四拜皇太子親王皆鞠躬四拜平身皇
太子妃親王妃皆四拜贊禮引皇太子詣前贊跪皇太
子跪引禮贊跪皇太子妃諸王及妃皆跪皇太子稱長
子某茲遇履端之節
履長之節謹率諸弟某等欽詣父王陛下稱
賀贊禮贊俯伏興平身皇太子妃諸王妃興贊禮引皇
太子復位贊鞠躬四拜皇太子諸王皆鞠躬四拜興平
身皇太子妃親王妃皆四拜禮畢引禮引皇太子及妃

諸王及妃詣中宮前贊禮贊鞠躬四拜皇太子親王皆
鞠躬四拜興平身皇太子妃親王妃皆四拜贊禮引皇

太子詣前贊跪皇太子跪引禮贊跪皇太子妃諸王及

妃皆跪皇太子稱長子某茲遇

履端之節
履長之節

謹率諸弟某

等恭詣母后殿下稱賀贊禮贊俯伏興平身皇太子俯
伏興平身引禮贊俯伏興平身諸王皆俯伏興平身皇
太子妃親王妃興贊禮引皇太子復位贊鞠躬四拜皇
太子諸王皆鞠躬四拜興平身皇太子妃親王妃皆四

拜禮畢引禮引皇太子親王及妃皆出

洪武七年更定不致詞止行八拜禮

東宮親王并妃正旦冬至朝賀太后儀

同前

東宮正旦冬至百官朝賀儀

洪武二十六年定凡正旦冬至日典璽官設東宮座於
文華殿中錦衣衛設儀仗於殿外東西教坊司設大樂
於文華殿內東西北向府軍衛列甲士旗幟於門外錦

衣衛設將軍十二人於殿中門外及文華門外東西相
向立儀禮司官設箋案於殿東門外設文武官拜位於
文華殿門外設傳令宣箋等官位於殿內東西執事官
先行四拜禮畢各就位引禮引各官詣文華門外北向
立儀禮司官啓請陞座導引官奉迎東宮具冕服出樂
作陞座樂止贊禮唱班齊鞠躬樂作四拜興平身樂止
唱進箋給事中前導箋案繇殿東門入置殿中內贊唱
宣箋目宣訖俯伏興平身唱宣箋外贊唱跪展箋官詣

案前取箋宣箋官宣訖內外皆贊俯伏興平身即舉案

於殿東外贊唱衆官皆跪代致詞官中道跪致詞云具

官臣某等茲遇

正旦則云三陽開泰萬物咸亨
冬至則云律應黃鍾日當長至

敬惟皇

太子殿下茂膺景福賀畢唱衆官皆俯伏興平身傳令

官跪啓傳令繇東門左出至丹陛東西向立稱有令贊

衆官皆跪宣令

正旦則云履端之節
冬至則云履長之節

同臻嘉慶贊俯伏

興樂作四拜平身樂止儀禮司官跪啓禮畢

東宮千秋節百官朝賀儀

洪武二十六年定東宮千秋節百官朝賀禮儀與正旦
冬至同但致詞云茲遇皇太子殿下壽誕之辰臣某等
敬祝千歲壽不傳令

宣德九年令皇太子千秋節冬至親王及天下五品以
上衙門遣官進箋者同在京文武百官詣文華殿行賀
東宮舊在文華殿南面受朝嘉靖間以文華殿為上位
臨御別殿改覆黃瓦隆慶二年冊立皇太子詔於文華
殿門東間設座受羣臣朝賀百官於文華門外列班

朝賀樂 朔望朝參同

樂器 戲竹二 簫四 笙四 笛四 頭管四

箏四 琵琶二 二十絃二 方響二 鼓一

拍板二 杖鼓六

樂章

陞殿還宮百官行禮奏千秋歲 堯年舜日勝禹

周慶雲生繚繞鳳樓風調雨順五穀收萬民暢歌

謳

東宮妃正旦冬至命婦朝賀儀

洪武間定前期女官陳設東宮妃座於宮中南向至日
清晨內官設儀仗於丹陛之東西及丹墀之東西贊禮
女官設外命婦班位於丹墀重行北向設贊禮位於丹
墀之東西設引禮二人位於外命婦班之北東西相向
設內贊女官二人位於宮內之東西外命婦既至宮門
引禮引命婦入就拜位侍衛者侍班如常儀尚儀入閣
啓東宮妃服禮服以出侍從如常儀樂作陞座樂止贊

禮贊班齊樂作贊四拜外命婦皆四拜樂止引禮引班
首繇西階升樂作自西門入進當座前北向立定樂止
內贊贊跪班首跪贊禮贊跪外命婦皆跪班首致詞云
某國公夫人妾某氏等茲遇

履端之節
履長之節

敬詣皇太子妃

殿下稱賀內贊唱興外命婦皆興引禮引班首繇西門
出復至拜位贊禮贊四拜外命婦皆四拜平身樂止尚
儀啓禮畢皇太子妃興樂作還宮樂止引禮引外命婦
以次出

聖節正旦冬至王府慶祝儀 見王國禮

聖節正旦冬至天下司府州縣慶祝儀

洪武間定凡遇正旦冬至聖誕之辰各處司府州縣官

公廳各齋沐具公服行禮 後改用朝服 告天祝壽曰某衙門

某官臣某等荷國厚恩叨饗祿位皆賴天生我君保民

致治今茲 正旦冬至 聖壽益增臣等下情無任忻躍感戴

之至

宣德四年令在外大小衙門遇正旦等節慶賀禮俱照

洪武初陷山呼行十四拜禮

禮部志稿卷九

禮部志稿卷九

禮部志稿卷九

禮部志稿卷九

禮部志稿卷九

禮部志稿卷九

禮部志稿卷九

禮部志稿卷九

今五王休氣

具王

欽定四庫全書

禮部志稿卷十

明 俞汝楫 編

儀制司職掌

朝儀

國初所定朝儀略具諸司職掌累朝以漸而詳其
增定見行者有朔望儀常朝儀午朝諸儀而班次
出入各有禁例具列於後

朔望朝儀

洪武三年定凡朔望日上皮弁服御奉天殿百官公服於丹墀東西對立俟引班引合班北面立再拜班首詣前同百官鞠躬唱某官臣某起居贊禮唱聖躬萬福班首平身復位同百官皆再拜引班引百官分班仍對立省府臺部官諸衙門有事奏者繇西階陞殿奏事畢降自西階引班引百官以次出如無事奏則侍儀繇西階陞殿跪奏如之俟侍儀降階引班導百官出十四年定

凡朔望日文武百官各具朝服俟鼓三嚴公侯一品二品官入東西角門俟其餘三品以下先於丹墀內班橫行序立鍾三鳴公侯一品二品以次入班序立鍾鳴畢儀禮司奏外辦導駕官導上位陞御座鳴鞭訖鳴贊唱班齊通贊詣中道班首臣某等起居聖躬萬福畢百官行五拜禮儀禮司奏禮畢而退十七年令百官凡遇朔望免行起居禮後更定朔望日上御奉天殿百官各具公服行禮常朝官序立於丹墀東西相向謝恩見辭官

序立於奉天門外北向候上陞座鳴鞭鴻臚寺贊排班樂作常朝官行一拜三叩頭禮畢樂止復班鴻臚寺奏謝恩見辭於奉天門外行五拜三叩頭禮畢鳴鞭駕興

常朝御殿儀

國初常朝或御殿令不行

洪武初定凡早朝文官自左掖門入武官自右掖門入如華蓋殿朝至鹿頂外東西序立鳴鞭訖守衛官至鹿頂內行禮訖就侍立位各衙門官以次行禮訖有事奏者入奏無事奏者四品以上及應陞殿者入殿內侍立

五品以下官出至鹿頂外列班北向立候鳴鞭以次出如奉天殿朝俱於華蓋殿行禮奏事畢五品以下官詣丹墀依品級列班重行北向立四品以上及翰林院官給事中監察御史等官於中左中右門伺候鳴鞭各詣殿內序立候朝退捲班以次出如先於奉天殿朝後却奏事者文武官於丹墀內依品級重行北向立候鳴鞭行禮訖四品以上及翰林院官給事中監察御史等官陞殿侍立五品以下仍前序立候謝恩見辭人員行禮

訖鳴鞭捲班退有事奏者於奉天門或華蓋殿進奏無
事奏者以次出二十二年令奉天殿常朝五府六部都
察院通政司大理寺錦衣衛等官於殿內侍立奏事止
於華蓋殿二十四年定侍班官員凡文武官除分詣文
華殿啓事外如遇陞殿各用履鞮照依品級侍班有違
越失儀者從監察御史儀禮司糾劾東班則六部堂上
官各於部掌印官都察院堂上官十三道掌印御史通
政司大理寺太常寺太僕寺應天府翰林院春坊光祿

寺欽天監尚寶司太醫院五軍斷事官及京縣官西班則五軍都督及首領官錦衣衛指揮各衛掌印指揮給事中中書舍人二十六年令凡文武百官於奉天華蓋武英等殿奏事必須穿著履屨方許入殿違者從糾儀御史禮部儀禮司官糾劾送法司如律問罪

常朝御門儀

洪武初定凡早朝文官自左掖門入武官自右掖門入如奉天門朝至金水橋南各依品級東西序立候鳴鞭

訖以次隨行至丹墀內東西相向序立守衛官先行禮
畢東西序立文武官入班行禮有事者以次進奏無事
奏者隨即入班朝退捲班分東西出

近儀凡早朝鼓起文武官各於左右掖門外序立候鍾
鳴開門各以次進過金水橋至皇極門丹墀東西相向
立候上御寶座鳴鞭鴻臚寺官贊入班文武官俱入班
行一拜三叩頭禮分班侍立鴻臚寺官宣念謝恩見辭
人員傳贊午門外行禮畢鴻臚寺官唱奏事各衙門應

奏事件以次奏訖御史序班糾儀

無失儀官則一躬而退

鴻臚寺

官跪奏奏事畢鳴鞭駕輿百官以次出

隆慶六年定以三六九日視朝

凡朝班序立

洪武二十四年令禮部置百官朝班序牌大書品級列丹墀左右木柵之上文武百官照品序立侍班二十六
年令公侯序於文武班首次駙馬次伯自一品而下各
照品級文東武西依次序立風憲糾儀官居下朝北給

事官居文武第一班之後稍近上便於觀聽不許攙越如有奏事須要從班末行至御前跪奏不許於班內橫過奏畢即便入班序立

永樂初令內閣官員侍朝立於金臺東錦衣衛在西後移下貼御道東西對立

景泰三年令師保兼官品同者立班以衙門為次

天順三年奏准凡方面官入朝遞降京官一班序立

嘉靖九年令常朝官叩頭畢內閣官於東陞錦衣衛官

於西陞各以次陞立於寶座之東西錦衣衛官在司禮
監官之南遇有欽差官及四夷人等領勅翰林院詹事
府左右春坊司經局堂上官輪流一人捧勅立於內閣
官之後稍上候領勅官面辭捧勅官下立於御前候承
旨訖繇左陞而下循御道邊行授與領勅官仍回至本
班立

萬曆三年題准常朝該日記注起居史官四員列於東
班各科給事中之上稍前以便觀聽四年議准五府都

督官常朝班次不當入侯伯班仍照殿班立於錦衣衛官之後稍上待錦衣衛堂上官詣金臺邊北司官於臺下各侍立仍與南北司無執事官同班而序於其上

凡入朝次第

洪武二十四年令朝參將軍先入近侍官員次之公侯駙馬伯又次之五府六部又次之應天府及在京雜職官員又次之

成化十四年令朝參官員遇鼓起時俱於左右掖門外拱

候東西班次照依衙門品級序其進士各照辦事衙門
次序立於見任官後

凡糾舉失儀

洪武初令百官有未閑禮儀新任及諸武臣聽侍儀司
官每日於午門外演習御史二員監視有不如儀者糾
舉百官入朝失儀者亦糾舉如律又令朝班每日都察
院輪委監察御史二員侍班糾察失儀

弘治十二年令朝班內或言語喧嘩及吐唾在地者許

序班挈送御前請處該奏請者具本奏請十四年令早朝遇雨門上奏事糾舉失儀人員序班一員挈住一員門上面奏

嘉靖元年奏准失儀官員應面糾者御史照舊先糾若御史不糾許序班糾但不許越次六年令凡奉天門早朝畢聖駕下階南行兩班官員不許輒便退班與御轎並行亦不許吐唾語話序班往來巡視有違犯者堂上官具奏其餘即時挈赴御前治罪十年題准六科每月

給事中二員凡遇開朝與糾儀御史及鴻臚寺官同行
查點十一年令朝參官不遵禮法者三品以上具奏處
治其餘即時挈奏鴻臚寺官通同不行糾舉一體治罪
萬曆四年議准於左右掖門內各設序班分立東西與
原設催促入班序班二員一同糾察有喧嘩說話者即
時記認候奏事畢一併糾舉 十一年令於金水橋邊
增設序班三員北向站立俟東西兩班站定各於班末
熟視有回顧耳語咳嗽吐唾者即時糾舉其京堂四品

以上翰林院學士及領勅官俱不面糾 十二年議令
吉服朝參日期除祭祀齋戒不面糾外其餘照常糾儀
又令參將見朝在京營者照京官儀不贊跪在外者
照外官儀贊跪失儀俱面糾

午朝儀

景泰初定凡午朝上御左順門先期內官設御座於左
順門之北設案稍南文武執事奏事等項官員俱於左
掖門內伺候駕出視朝各官照班次序立內閣并五府

六部奏事官六科侍班官俱於案西序立侍班御史二員序班二員將軍四員俱於案南面北立鴻臚寺鳴贊一員於案東面西立錦衣衛鴻臚寺堂上官於奏事官班以次面東立管將軍官并侍衛官立於將軍之西五府六部等衙門官照依衙門次第出班奏事通政司官照依常例引人奏事三法司官遇有奏事俱隨班其常日答應內刑部大理寺郎中等官各一員答應都察院侍班御史答應其餘衙門官有事者分管答應

鴻臚寺官贊奏事畢徹案各官退各衙門如有機密重
事許赴御前具奏 二年令午朝翰林院先奏事

萬曆三年題准午朝該日記注起居史官四員列於御
座西稍南

忌辰朝儀

凡遇各廟忌辰上服淺淡服御奉天門視事不鳴鐘鼓
百官各服淺淡服黑角帶朝參其謝恩見辭官具公服
如常儀

永樂元年奏定前二日上服淺淡服御西角門視事

宣德

十年仍改奉天門視事

不鳴鍾鼓不行賞罰不舉音樂禁屠宰文

武百官各具淺淡服黑角帶朝參二年令今後輟朝

誦經等事不必行

宣德三年令凡遇忌辰通政司禮部兵馬司免引囚奏事
五年勅淳皇帝淳皇后忌日官員朝參輟奏事高
皇帝高皇后文皇帝文皇后昭皇帝忌辰悉輟朝參

正統三年正月初三日恭遇宣宗章皇帝忌辰令陞殿

朝參如常儀

弘治十四年令遇忌辰朝參官不許服紵絲紗羅恭仁
康定景皇帝恭讓章皇后忌辰如遇節令服青綠花樣
宣宗章皇帝忌辰如遇奏祭祀許服紅

嘉靖元年奏准正月初三日宣宗章皇帝忌辰二月十
九日恭仁康定景皇帝忌辰十一月初五日恭讓章皇
后忌辰許穿青紵絲

隆慶元年題准凡遇忌辰文武百官不問內外班行謝

恩見辭俱淺淡色服烏紗帽黑角帶不許用公服

輟朝儀

凡聞皇妃喪輟朝三日發引下葬各免朝一日親王喪輟朝三日公主喪及下葬各輟朝一日羣王及文武大臣喪年終類輟朝一日先期禮部具奏仍出告示於長安左右門至日早朝不鳴鍾鼓不鳴鞭不設儀仗文武百官各服淺淡服黑角帶於奉天門朝參其謝恩見辭官員亦不許公服如常朝官服色

諸王朝見儀

洪武二十六年定凡各王大朝行八拜禮常朝一拜叩頭禮凡伯叔兄見天子在朝行君臣禮於便殿內行家
人禮伯叔兄坐東面西坐受天子四拜伯叔兄就於受
禮位坐天子居正中南面坐以尚親親之義存君臣之
禮

外戚朝見儀

洪武二十六年定皇后父見上行君臣禮后見父母行

家人禮皇太子見皇后父母皇后父母立於東西向皇太子立於西東向行四拜禮皇后父母立受兩拜答兩拜

百官朝見儀

出入等儀附

凡百官朝見 洪武二十六年定稽首頓首五拜乃臣下見君上之禮先拜手稽首四拜後一拜叩頭成禮稽首四拜者百官見東宮親王之禮其見父母亦行四拜禮其餘官長及親戚朋友相見止行兩拜禮

凡謝恩見朝 洪武二年令在京文武官有故告假及

出使皆奉辭還皆奉見而奉特旨授官及除授內外百

職皆即時謝恩到任之日仍望闕行禮省選者亦到任

日望闕行禮或除郡縣官給賜銀物聽宣諭者皆總行

謝禮俱五拜三叩頭

其應合謝恩見辭及應免者詳見鴻臚寺

又令凡早

朝謝恩見辭人員都察院輪委監察御史二員侍班

凡謝恩者居先見者次之辭者又次之俱行五拜三叩

頭禮 凡內外諸司文武官員已入流者謝恩見辭必

具公服行禮 凡朝覲進表箋官員見辭謝恩俱用公服如面除而不及具服即時謝恩者勿拘其或常服見者綴班後如以軍務遠來及承制使還即時引見者不在此例 凡在外諸司遣人來朝及朝使還京者俱先朝見後詣所司否者以違制論

永樂六年奏准在外軍民官司及各王府公差人員在京公侯駙馬伯都督及內官出使隨帶人員并各衛所等衙門公差人等到京除例該引見者照例外其不在

常例者俱赴鴻臚寺報名謝恩見辭本寺將各人姓名
附簿仍將各起總數每日早另具題本進呈及引各人
於承天門外行叩頭禮

今在午門
前行禮

二十二年令凡方

面大臣來朝鴻臚寺即皆引見

宣德九年令在外各衙門官吏人等該謝恩者許在本
處望闕謝恩其有事赴京朝見待有明文方許

成化間奏准凡謝恩見辭應該鴻臚寺報名官員俱用
報單或親自赴寺或差人遞報各從其便 凡病痊官

員舊例免見以後惟文武四品以上及翰林院學士尚
寶司六科都給事中武官公侯伯都督及駙馬儀賓錦
衣衛指揮等官患病過三日者俱公服於午門外行朝
見禮若大臣曾蒙遣醫調治并賜物慰問者行禮後仍
面謝大臣考滿有賜者同

凡出入 洪武二十六年定文武百官出入朝門各照
品級第加遜敬如一品以下官遇公侯駙馬加敬禮立
則旁立行則後從三品四品官遇一品官加敬禮行立

俱後從五品以下官做此俱不許攙越失儀如有宣名
不在此限 又定官員入朝門須要拱手端行威儀整
肅不許私揖及吐唾不敬 又令入朝行立坐食去處
不許談笑喧嘩指畫窺望

凡行走 洪武初令百官早朝入班行禮及朝退捲班
俱分文東武西不許徑越御道東西行走如在奉天門
朝其有事東西往來者出至金水橋南行過 二十六
年令大小官員隨從上位行丹墀身常朝北不許南向

或左或右環轉隨侍如上位陞奉天門及丹陛其隨從
官員不得徑行中道并正道如有旨令行方許於側邊
隨行 又令官員人等入內府合行門道須從邊行不
得當中如東門近東邊行西門近西邊行其門東西相
向者近南邊行如遇雨雪免朝有事奏者不拘此限

又令奉天殿丹陛中三道階級并奉天門中三道階級
皆不許人行百官繇東西階行傳制遣使持節進表等
儀皆繇東階出入隨駕傘扇儀仗繇正門中道兩旁出

入 又令朝廷頒降詔書冊命從中道中門出近東而
行其內外官員齎捧御製文字及御用之物進呈不許
直行中道或左右取便以行至御前正中跪進御膳等
物亦不可當中道直行許正道邊左以進凡御座處即
為正道如上御奉天門則於正門邊東入將至御前正
中供具膳畢而出亦如之若上常所往來處其奉御內
侍捧執御用之物聽使令者皆須近後取便左右行不
許隨後徑馳中道

凡聽諭 洪武二十六年令百官朝參遇有聖諭教戒
須要專心致意拱聽分明省身克己不許放肆 二十
九年令凡有聖諭大小百官於丹陛前或奉天門各照
品級序立候上御座跪聽

凡受賜 洪武三年令以所賜物先置奉天門內乃引
其人入見聽宣諭然後給之就令謝恩而去 八年令
朝官受賜於御前跪受如衣則服以拜賜皆五拜叩頭
在官受賜者初行四拜受賜後四拜

凡賜座 洪武初令凡朝退燕閒及行幸處文職三品
以上武職二品以上及勲舊文學之臣賜座其餘非奉
特旨不許輒坐 二十六年令文武官御前侍坐遇有
大小官員奏事必須起立候奏事畢復坐不許倨坐失
儀如有特旨賜坐則復坐 又令凡賜坐不許推讓坐
後遇有顧問初時跪對畢即坐若復有所問坐朝上對
不必更起同列侍坐或被顧問一人奏對餘皆靜聽毋
撓言勦說如各有所見候其人言畢方許前陳 又令

執政大臣年高者取自特旨免朝倘有顧問於便殿賜坐

凡雜儀 洪武初令百官既具朝服公服之後毋舉笏

行私禮 又令朝叅近侍病嗽者許即退班或一時眩

暈及感疾不能侍立者許同官掖出 又令百官入朝

遇雨雪許服雨衣 又令文武官除本等紗帽外遇雨

雪許戴雨帽公差出外許戴帽子入城不許其公差人

員出外者亦如之

成化十三年奏准文武官員入朝大臣常川許帶官吏頭目每人二名若遇陰雨大臣添一人小官許帶一人各執雨具近例朝覲外官及舉監人等不許擅戴暖耳入朝

諸司奏事儀

凡早朝奏事 洪武二十九年定凡上御奉天門百官行叩頭禮畢分東西班序立儀禮司依次贊某衙門奏事奏畢復入班候諸司奏完儀禮司贊奏事畢退出其

奏事次第一都督府二十二衛三通政司四刑部五都
察院六監察御史七斷事司八吏部等五部九應天府
十兵馬司十一太常寺十二欽天監若太常寺奏祭
祀則在各衙門之先 又定凡上御奉天華蓋謹身殿
奏事百官行叩頭禮畢近侍官及監察御史陞殿侍班
其奏事官俱陞殿分東西班立儀禮司依次贊某衙門
奏事奏畢各官依次退出其餘官員不陞殿者俱於中
左中右門外兩廊伺候奏事官出則皆出若於文華殿

啓事則詹事府在先餘依奏事次第

永樂七年令大寒早朝上御奉天門百官行叩頭禮侍班俟鴻臚寺官引謝恩見辭人員行禮畢駕輿御右順門內便殿百官有事奏者以次入奏無事者退治職務正統七年令凡看牲及遣祭官遇聖駕陞殿俱於殿中復命若御奉天門視事亦於百官未行禮之先復命成化元年令每日早朝各衙門并公差官員具本面奏及通政司類進本狀各具手本備開所奏事件送禮科

收照次日將收到奏目并各衙門送到奏題本狀通具奏目送司禮監交收以候類進

凡晚朝奏事 洪武二十九年定凡晚朝惟通政司六科給事中守衛官奏事各衙門有軍情重事許奏餘皆不許

永樂四年令六部及近侍官有事當商確者皆於晚朝陳奏

凡奏啓事目 洪武二十八年定

五軍都督府合奏啓 軍情 機密 守衛門禁等

事 修築城池 改設衛所 賞賜馬匹關換轉

銷等項 提問軍職 整點大軍官員房屋 調

撥官軍及陞調隊伍 內外軍官奔喪遷葬祭祀

旗軍併鎗陞用月報為事軍官 官軍有弟姪

兒男為事充軍告完聚 關領軍器 給配為奴

人口告給聚 提取邊境思軍 查理軍士回話

軍官替職未及六十歲者各都司年終回銷未

完勘合官吏 還鄉老幼軍屬 首告收藏軍器

知在原告患病在逃病故 五軍所屬在京衛

分凡奏啓事務除軍中機密事情及守衛門禁關防等事不分官旗軍人許令徑奏其餘合行事務俱繇該府具奏施行

吏部合奏啓 除授官員陞調改除黜陟 開設草

併衙門 襲爵封贈 誥勅散官 土官承襲

致仕官員 貼黃 給由起復考覈給假官員

監生問事吏員書寫告出仕放回事故人材秀才

官員人等告侍親殘疾送問五品以上官員

起取人材秀才官員復姓更名官員告極刑

吏告重役京官并問事書寫人告丁憂進

人材秀才冊

戶部合奏啓歲奏會計稅糧馬草改撥糧儲

賑濟饑民賞賜水旱災傷拋荒田土除豁

稅糧僭運邊方糧儲調撥官軍屯種為事

官軍告免追該扣俸糧 給散煎鹽工本 預備

糧儲 提問在外五品以上官員在京官員 原

告病故拖欠并侵盜錢糧追徵無納 歸并州縣

點開戶口 欽給官民房屋田地 各處盤點糧

斛

禮部合奏啓 賞賜 軍官祭祀 建言 表箋

灾異 旌表 科舉 四夷進貢 鑄降印信

罷閒事故生員 雨澤 日月交食 歷日 館

待賓客 侍親 遣官祭祀為格為例 冠婚喪

祭 外國請求 考察禮儀制度 厨役告事故

下程鈔錠 僧道度牒

兵部合奏啓 選用軍職陞調襲替除降等項軍務

誥勅封贈 馬政送收關換整點調撥 優給

貼黃 符驗 陞用總小旗 整點大軍 開

設衙門優給軍役等項 調撥官軍 整理驛傳

投充力士較尉 軍職官員家人投軍 軍官

軍人告給正軍 採集首報查理軍士 旗軍勦

合由帖 給賞 軍官復姓更名 原告逃故

護衛軍旗及邊衛恩軍有犯提取 提問軍職并

在京文職及在外文職五品以上官

刑部合奏啓 追問黨逆 處決重囚 犯法軍官

送問并申訴回話等項 首黨逆原告實引賞

發落犯人涉虛抵罪疎放被誣者提問軍職并在

京文職及在外五品以上官各衙門盤獲犯屬

提邊遠恩軍 病故原告并被問軍官 追贓不

足家屬 綁縛民害等項得實引賞原告發落犯

人 抄劄入官馬羸 編發恩軍工役囚人進冊

工部合奏啓 水利水害修築河岸橋道 在外修

理城池衙門公廨倉廩等項營造支用官物差撥

軍民人匠 在京在外衛所營造及修理船隻關

支一應物料 成造軍器軍裝 關支軍器 賞

賜 收買牛隻農具 各處差人解納銅鉄等項

顏料門上秤折 起差均工人夫 提到工役故

囚補役戶丁告單丁田糧重大老疾及有充軍

在京住坐倉脚夫老疾告回原籍

都察院合奏啓 處決重囚 追贓不足家屬追問

并申訴回話 追問黨逆 病故原告及軍官相

視 抄劄等項入官馬羸 賞賜犯法軍官 點

差御史 提取邊軍 提問軍職并在外文職五

品以上官在京官員

大理寺合奏啓 引奏軍官 日奏審過刑名月奏

囚數 軍官應合襲廕子孫并授封祖父母父母

妻有犯 駕前將軍力士較尉有犯重罪并二次

犯罪者 文職官類奏逐日先將發審奏本奏送

該科公文立案回報該衙門先將其餘人數依律

發落有司入流官員類奏 覆奏重刑 各衙門

二次番異三次擬罪不當或將易於歸結事理淹

禁日久致令原告并平人身死及問事顛倒是非

并發審奏本不如式等項送問原問官吏

五軍斷事官合奏啓

後革斷事官

追問黨逆送問

并申訴回話 軍官原告患病及病故提問軍職

并在外文職五品以上官在內京官 抄劄等項

入官馬羸 給賞 犯法軍官 提取邊軍 處

決重囚 追贓不足家屬

十二衛合奏啓 內除軍中機密事情及守衛門禁

關防等不分官旗軍人許令徑奏其餘合行事務

自下而上俱繇本衛具奏 軍中機密事情 守

衛門禁等事 整點大軍馬匹關撥轉銷等項

關支一應賞賜 官員房屋 調撥官軍隊伍

官員奔喪遷葬祭祀 關領軍器 還鄉老幼軍

屬 旗軍併鎗陞用 首告收藏軍器 月報官

軍馬羸給配家小 凡不合奏啓止呈該衙門施

行軍官替職 勾補逃亡事故等項軍士 病故

軍職官員 老病不堪應役無丁旗軍 還官賞

賜鹽糧 倒死馬羸驢肉臟 軍官缺員 貼黃

給誥 出姓更名 缺首領官吏 幼軍收充正

軍 老軍代役 收受倉糧草料放支等項錢糧

文卷差錯遺漏送法司 奸盜詐偽人命鬪毆相

爭一切詞訟連狀送斷事官理問如有干礙軍情

斷事官具奏提問

凡奏事儀節 洪武三年定凡百官奏事皆跪有旨令

起即起進退皆以次毋得撓越 凡諸儒臣於御前奏

事或進呈文字恐有口氣體氣須退立二三步毋輒近御案立須於東西隅不得直前凡上位行立去處諸人不得輒便奏事跪拜必候坐定方許奏事行禮俱要取便北向二十六年令凡百官御前奏對務必從實知則為知不許妄對凡奏啓限制洪武二十五年令凡差使人員除王府并軍前差到及要緊軍務奏聞外其各衙門催辦公事勾軍提人等項復命人員如有事務不完等項該科批寫緣由送各該衙門整理及各衙

門一應編號手本送該科皆不必煩奏 二十九年令
朝班奏啓事務除五府六部都察院通政司斷事官十
二衛照依定例具本奏啓其餘官員軍民人等若有事
奏儀禮司打點六科給事中各一員每日於午門外照
依該管事務總收奏狀入奏監察御史一員公同看視
其有不經繇各該官員將自己瑣碎事務徑自奏啓紊
煩者罪之 三十年令通政司許早晚朝奏事及有軍
情重事不時入奏其各衙門凡有一應事務止於早朝

大班內奏啓不許朝退又將瑣碎事務於右順門題奏
永樂八年令各衙門行過事件誤違舊制者許其改正
具本送該科不必面奏

凡題本覆奏 永樂二十二年令諸司有急切機務不
得即面陳者許具題本封進其餘大小公私之事並於
公朝陳奏

成化元年令一應奏題本有旨意者六部都察院等衙
門抄出即明白覆奏發落不許稽緩若過五日不覆奏

者該科以聞凡在京文武衙門奏題本謹封完備俱差
屬官捧入左順門進呈

諸司朝覲儀

凡天下諸司朝覲官自十二月十六日為始鴻臚寺官
陸續引見二十五日以後每日常朝方面官入至奉天
門前隨班行禮畢於文班內序立視常朝官品級各降
一等知府知州知縣及諸司首領官吏土官衙門把事
土吏人等俱於午門外行禮畢東西分班序立正月初

一日大朝會以後方面官於奉天殿前隨班序立知府以下奉天門金水橋南仍分東西序立其行禮俱如常朝儀

萬曆五年定五款

凡朝覲兩京府尹行太僕寺苑馬寺卿布按二司俱於十二月十六日朝見外班行禮畢繇右掖門至御前鴻臚寺官以次引見其鹽運司及府州縣有司官吏浙江江西十七日山東山西十八日河南陝西十九日湖廣

南直隸二十日福建四川二十一日廣東廣西二十二日雲南貴州二十三日北直隸二十四日各朝見外班行禮畢仍至御前鴻臚寺官引見如遇是日免朝各官止於外班行禮候御朝之日仍補行引見禮二十五日以後例該常朝除兩京府尹照京官品級一體行禮序立外其行太僕寺苑馬寺卿布按二司入至皇極門前隨班行禮畢於文班內序立於京官之下各以次遞降一等知府知州知縣及諸司首領官吏土官衙門把事

土吏人等午門外行禮畢東西分班序立正旦朝賀各官俱入殿前行禮其餘陞殿日期行太僕寺苑馬寺卿布按二司仍於殿前隨班各降一等序立鹽運司知府以下于金水橋北東西序立其行禮俱如常儀

凡朝覲官見辭謝恩不論已未入流各具公服行禮正旦朝賀各具朝服但不許僭著朱履

凡遇常期俱穿本等錦繡服色

凡獎賞廉能先期內官設御座於會極門之北設賞案

稍東文武執事奏事等項官員各具吉服并序班引廉
能官員各具青錦繡服至期俱於左掖門內斜廊面北
序立管將軍官侍衛官俱於會極門礪礪下立候駕出
上陞御座聽傳呼內閣并執事奏事等項官員繇大礪
礪下序班引廉能官繇斜廊行至東廊小礪礪下面東
立候管將軍官并侍衛官鴻臚寺掌印官以次立於御
座南北向各立定內閣并執事奏事等項官員至大礪
礪上鴻臚寺掌印官贊入班各官照班次序立鳴贊贊

鞠躬行一拜三叩頭禮畢內閣并吏部都察院堂上官
禮部錦衣衛掌印官吏科都給事中掌河南道御史禮
部郎中俱於御座西面東序立侍班御史二員序班二
員俱於御座南面北立執事序班四員於賞案稍南面
西立鴻臚寺掌印官贊奏事贊起案序班舉賞案置於
御前稍南贊引廉能官序班引廉能官立於案南照班
次序立鳴贊贊跪廉能官跪鴻臚寺掌印官贊吏部等
衙門過吏部都察院吏科都給事中掌河南道御史過

中跪吏部堂上官奏後面跪的是廉能官見在應朝某
省某等官某等若干員奉旨引來聽候獎賞奏知奏畢
起身一躬入班鳴贊贊叩頭廉能官叩頭候天語獎諭
承旨叩頭上說與他每賞賜還與酒飯喫鴻臚寺掌印
官并禮部郎中承旨畢鳴贊贊叩頭廉能官叩頭畢起
身一揖一躬序班引下鴻臚寺掌印官贊起案序班舉
案置於原所吏部都察院堂上官吏科都給事中掌河
南道御史過中跪致詞仰惟皇上留心吏治澤被生民

臣等不勝慶忭叩首稱賀鳴贊贊叩頭吏部等官叩頭
畢起身一揖一躬入班鴻臚寺掌印官過中跪奏奏事
畢候駕興各官退

凡大班糾劾朝覲官考察存留者鴻臚寺官引上御道
跪法司及科道官各露草糾劾怠職之罪朝覲官俱俯
伏免冠待罪候旨如奉旨免宥隨即加冠叩頭連呼萬
歲次日謝恩仍前朝參

凡朝覲官事完辭朝兩京府尹行太僕寺苑馬寺卿布

按二司外班行禮畢仍照前引見面辭鹽運司知府以下等官止於外班行禮

萬曆七年諭張真人方外之流無民社寄其朝覲免行

入朝門禁

洪武十一年詔朝參文武官給領牙牌懸帶出入無牌者依律論罪借者及借與者罪同在外來朝官於各門附名出入 又令守門指揮千百戶日一更代士卒三日一更代凡內官內使出入皆用號牌若有以兵器雜

藥進者論如律守門軍士失於覺察者罪如之若奉駕
出入則以御史一員臨門察視二十一年令朝參官
員門籍各衙門自置
景泰三年令官員人等至皇城四門下馬牌邊橫過俱
下馬其順行不係橫過不在禁例

成化間令文武官員公差患病等項呈堂出印信手本
填註門籍候病痊及公差回還之日仍用手本開註

又令文武大小官員入朝跟隨辦事官吏人等照出午

門例於長安左右門承天門端門各下小木牌進入出
則收回

嘉靖九年題准各文武衙門公差官員奉有勅書責限
完事及公所寫遠不便趨朝者方許於門籍註差仍開
奉何勅書公所係在何處以便查考其患病若止係咳
嗽等小疾於朝儀有礙者量許註門籍五日若病非旦
夕可愈者必須堂上官印信手本開寫明白其有累月
不朝及全司稱病者文官聽吏科武官聽兵科每月將

門籍查出糾舉其屢經糾劾文官至三次武官至五次
吏兵二部徑自奏聞區處

東宮朝儀

洪武間定凡朔望日文武百官退朝詣文華殿門外分
東西侍立俟皇太子陞殿樂作百官行一拜禮其謝恩
見辭官員人等亦隨班行禮禮畢以次出十四年令
啓事東宮者皆稱臣

永樂二年令文武官員常朝行叩頭禮三師三少詹事

府官左右春坊司經局官翰林院官鴻臚寺官六科給
事中錦衣衛官左右序立於文華殿門之外鴻臚寺序
班通事舍人引文武百官於丹陛下丹墀內東西序立
照依衙門資次啓事監察御史二員司直郎清紀郎日
輪二員北向侍立糾儀啓事畢百官齊退遇有召問亦
須前項官員一同進出如獨進并獨員留後者許監察
御史鴻臚寺官司直郎清紀郎糾劾
合啓事務在京衙門止用奏本在外衙門務要奏本一本

啓本一本其詹事府主簿錄事同春坊司直郎清紀郎司
諫分為六科於司禮監共關揭帖開寫逐日啓過本內
事件畧節緣繇及令旨所發落大畧六科給事中亦具
題帖各另奏進 詹事府主簿錄事同左右春坊司直
郎清紀郎司諫等官遇啓事各紀皇太子令旨如所啓
事或差謫隨即糾劾啓事畢同詹事府詳審事之可否
可行者令該司批所得令旨或事不可行及啓本內與
說帖不同不問事之大小悉以奏聞

登極儀

國初登極禮儀吳元年所定用王禮頗略故不載
至洪武元年高皇正大位其儀始詳昭皇以儲宮
嗣立稍有所更定累朝因之惟肅皇自藩國入繼
大統與嗣皇異其儀各備載於後云

高皇帝登極儀

洪武元年圜丘告祭禮成較尉設金椅於郊壇前之東
南向設冕服案於金椅前候望瘞畢丞相諸大臣率百

官於望座位跪奏曰告祭禮成請即皇帝位羣臣扶擁
至金椅上坐百官先排班執事官舉冕服案寶案至前
丞相諸大臣奉袞冕跪進置於案上丞相等就取袞冕
加於聖躬丞相等入班通贊唱排班班齊鞠躬樂作拜
興拜興拜興拜興平身樂止百官拜興如之通贊唱班
首詣前引禮引丞相至上位前通贊唱跪搢笏丞相跪
搢笏承傳唱衆官皆跪百官跪捧寶官開盃取玉寶跪
授丞相丞相捧寶上言皇帝進登大位臣等謹上御寶

尚寶卿受寶收入盃內通贊唱就位拜興平身百官拜
興如之通贊唱復位引禮官引丞相自西降復位通贊
唱鞠躬拜興拜興平身搢笏鞠躬三舞蹈跪左膝三叩
頭山呼山呼再山呼跪右膝出笏贊俯伏興平身鞠躬
拜興拜興拜興拜興平身皇上解嚴通贊唱捲班百官
退禮畢具鹵簿導從詣太廟奉上冊寶追尊四代考妣
仍告祀社稷還具衮冕御奉天殿百官上表稱賀前期
侍儀司設表案於丹墀中內道之西北設丞相以下百

官拜位於內道上下之東西每等異位重行北面捧表
官宣表官展表官位於表案之西東向糾儀御史二人
位於表案之南東西相向宿衛鎮撫二人位於東西陞
下護衛百戶二十四人位於宿衛鎮撫之南稍後知班
二人位於文武官拜位之北東西相向通贊贊禮二人
位於知班之北通贊在西贊禮在東引文武班四人位
於文武官拜位之北稍後皆東西相向引殿前班二人
位於引武班之南舉表案二人位於引武班之北舉殿

上表案二人位於西階之下東向其丹陛上設殿前班
指揮司官三員侍立位於陛上之西東向宣徽院官三
員侍立位於陛上之東西向儀鸞司官位於殿中門之
左右護衛千戶八人位於殿東西門之左右俱東西相
向鳴鞭四人列於殿前班之南北向將軍六人位於殿
門之左右天武將軍四人位於陛上之四隅皆東西相
向殿上尚寶司設寶案於正中侍儀司設表案於寶案
之南文官侍從班起居注給事中殿中侍御史尚寶卿

位於殿上之東西向武官侍從班懸刀指揮位於殿上之西東向受表官位於文官侍從班之南西向內贊二人位於受表官之南捲簾將軍二人位於簾前俱東西相向是日清晨拱衛司陳設鹵簿列甲士於午門外之東西列旗仗於奉天門外之東西龍旗十二分左右用甲士十二人北斗旗一纛一居前豹尾一居後俱用甲士三人虎豹各二馴象六分左右左右布旗六十四門旗日旗月旗青龍白虎旗風雲雷雨江河淮濟旗天馬

天祿白澤朱雀玄武等旗木火土金水五星五嶽旗熊
旗鸞旗及二十八宿旗各六行每旗用甲士五人一人
執旗四人執弓弩設五輅於奉天門外玉輅居中左金
輅次草輅右象輅次木輅俱並列丹墀左右布黃麾仗
黃蓋華蓋曲蓋紫方傘紅方傘雉扇朱團扇羽葆幢豹
尾龍頭竿信幡傳教幡告止幡絳引幡戟氅戈氅儀鎗
氅等各三行丹陛左右陳幢節響節金節燭籠青龍白
虎幢班劍五杖立瓜卧瓜儀刀鎧杖戟骨朵朱雀玄武

幢等各三行殿門左右設圓蓋一金交椅金脚踏水盆
水罐團黃扇紅扇皆較尉擎執侍儀舍人二人舉表案
入就殿上鼓初嚴百官具朝服次嚴各依品級齊班於
午門外以北為上東西相向通班贊禮及宿衛鎮撫等
官入就位諸侍衛官各服其器服及尚寶卿侍從官入
鼓三嚴丞相以下文武官以次入各就位皇帝袞冕陞
御座大樂鼓吹振作樂止將軍捲簾尚寶卿以寶置於
案拱衛司鳴鞭引班引文武百官入丹墀拜位北面立

初行樂作至位樂止知班唱班齊贊禮唱鞠躬拜樂作
四拜興平身樂止捧表以下官繇殿西門入內贊唱進
表捧表官捧表跪進於案前受表官搯笏跪於案東受
表置於案出笏興退立於殿內之西東向內贊唱宣表
宣表官詣案前搯笏取表跪宣於殿內之西展表官搯
笏同跪展宣訖展表官出笏一人以表復置於案俱退
立於位宣表官俯伏興同捧表以下官出殿西門降自
西階復位贊禮唱鞠躬樂作四拜樂止唱搯笏鞠躬三

金定四庫全書
卷十
舞蹈唱跪唱山呼各拱手加額呼萬歲者三樂工軍較
齊聲鼓應之唱出笏俯伏興樂作四拜賀畢遂遣官冊
皇后冊立皇太子以即位詔告天下

昭皇帝登極儀

宣德以後同

永樂二十二年七月公侯駙馬伯文武百官及軍民耆
老等上箋勸進者三令旨俞允乃命禮部擇日具儀先
期司設監等衙門於華蓋殿陳御座於中仍於奉天殿
設寶座欽天監設定時鼓尚寶司設寶案於奉天殿鴻

臚寺設表案於丹陛上教坊司設中和韶樂設而不作
鴻臚寺設詔案及錦衣衛設雲蓋雲盤於奉天殿內東
別設雲蓋於承天門上設雲輿於午門外設宣讀案於
承天門上西南向是日早遣官祇告天地宗廟社稷上
具孝服設酒果親詣大行皇帝几筵前祇告受命畢即
於奉天殿前設香案酒果等物具冕服行告天地禮隨
赴奉先殿謁告祖宗畢仍具袞冕詣大行皇帝几筵前
行五拜三叩頭禮畢詣母后前行五拜三叩頭禮畢詣

奉天殿即位是日早鳴鍾鼓錦衣衛設鹵簿大駕上服
袞冕御華蓋殿文武百官各具朝服入丹墀內候鴻臚
寺引執事官進至華蓋殿行禮畢贊各供事奏請陞殿

上繇中門出陞寶座錦衣衛鳴鞭文武百官上表稱賀

上命百官免賀免宣表止行五拜三叩頭禮

成化以後
執事官進

至華蓋殿將行禮時
即傳旨百官免賀

百官出至承天門外候翰林院官

齋詔書用寶訖鴻臚寺官請頒詔翰林院官捧詔授禮
部官繇奉天殿左門出錦衣衛於午門前候捧詔置雲

蓋中導引至承天門開讀行禮如常儀

肅皇帝登極儀

正德十六年三月十四日奉武宗皇帝遺詔迎上入承
大統次日皇親駙馬司禮監太監內閣大學士禮部尚
書等官齋捧詔諭金符馳詣安陸藩府奉迎內官監工
部蓋行殿於宣武門外南向司設監設帷幄御座於中
尚衣監備翼善冠服錦衣衛備鹵簿大駕以候四月二
十一日早文武百官出郊各具青綠錦繡服迎駕入行

殿朝見行四拜禮明日即皇帝位先期司設監設御座
於華蓋殿設寶座於奉天殿欽天監設定時鼓錦衣衛
設鹵簿大駕尚寶司設寶案於奉天殿鴻臚寺設表案
於丹陛上教坊司設中和韶樂設而不作鴻臚寺設詔
案錦衣衛設雲蓋雲盤於奉天殿內之東別設雲蓋於
承天門設雲輿於午門外設宣讀案於承天門上西南
向至日遣官祭告天地宗廟社稷駕繇大明門入至文
華殿省定詔草欽改年號畢設酒果於大行皇帝几筵

前上具素服謁告畢設香案酒果等物於奉天殿丹陛
上上具衮冕服行告天地禮畢詣奉先殿奉慈殿謁告
畢仍詣大行皇帝几筵前行禮畢詣慈壽皇太后莊肅
皇后前各行禮畢上御華蓋殿文武百官各具朝服入
丹墀內序立鴻臚寺引執事官進至華蓋殿傳旨百官
免賀止行五拜三叩頭禮傳畢贊執事官行禮贊各供
事鴻臚寺正官跪奏請陞殿上繇中門出陞寶座錦衣
衛鳴鞭欽天監報時鴻臚寺贊行五拜三叩頭禮訖百

官出至承天門外俟翰林院官齋詔用寶訖鴻臚寺官
 奏請頒詔翰林院官捧詔授禮部官繇奉天殿左門出
 錦衣衛於午門前候捧詔置雲蓋雲盤中導雲輿至承
 天門開讀行禮如常儀



禮部志稿卷十